

29. Ubicunque regis exercitus conspiciebatur, sive extremum agmen, ad iter se expediens, sive primum agmen, ordine instructo per viam proficiscens, ibi pleni exercitus opinionem excitabat.

30. Succi, e ducis illius elephantorum temporibus stillantis irrigatione, atque equorum ungularum ictibus, pulvis in via assumpsit luti statum, lutumque pulveris conditionem.

31. Exercitus, viam persequens per *Vindhyæ* montis regiones, multifariam divisus, *Revæ* fluvii instar, cavernas magno strepitu resonare fecit.

32. Princeps ille, cujus curruum rotæ metallis contritis rubescebant, atque cujus tubarum sonus agminis strepitu miscebatur, *Vindhyam* montem trajecit, conspiciens munera a *Pulindis* sibi oblata.

33. Cum in illius montis ablutionum loco per pontem, ex elephantis colligatis constructum, *Gangam* tergum versus fluentem trajiceret, anseres, in volatu suo per aera alas agitantes, sine ipsius labore flabellorum vice fungebantur.

34. Venerabatur *Gangæ* aquam, navibus agitatam, cujus ope ejus majores, corporibus a *KAPILA* irato in cineres redactis, ad immortalium habitationem pervenerant.

35. Ita *KUSAS* aliquot diebus itinere finito, ad *Sarayuis* ripam aggressus, conspexit centenas *RAGHUIDARUM*, qui sacrificia ibi peregerant, postes sacrificales, in locis sacris erectas.

36. Eum, cujus milites defatigati erant, e lucis prope regiam stirpis sui urbem adflabat ventus, qui arborum florentium ramos leniter commoverat, frigidisque *Sarayuis* undas tetigerat.

37. Tum rex ille potens, stirpis suæ vexillum, qui hostes sagittis transfoderat, civium amans, catervas suas, quarum vexilla vento movebantur, castra ponere fecit in campo urbi vicino.

38. Ipsam urbem, quomodo erat, opificum a rege conductorum catervæ subsidiis congestis renovabant, sicuti nubes aqua dimissa renovant terram, æstu exsiccata.

39. Deinde *RAGHUIDARUM* heros per viros ædes struendi gnaros, postquam jejunaverant, pecoribus mactatis, urbis, eximiarum imaginum habitationis, adorationem peragendam curavit.